

Na osnovu člana 5. Zakona o međunarodnom i međuentitetskom cestovnom prijevozu ("Službeni glasnik BiH", br. 1/02 i 14/03), ministar komunikacija i prometa donosi

Pravilnik o uvjetima za izdavanje licence i kvalifikacijske kartice vozača

I OPĆE ODREDBE

Član 1. (Predmet)

Pravilnikom o uvjetima izdavanja licenci i kvalifikacijskih kartica vozača (u daljem tekstu: Pravilnik) propisuju se uvjeti izdavanja licenci i izvoda licenci za obavljanje međunarodnog cestovnog prijevoza (u daljem tekstu: međunarodni prijevoz), pristup djelatnosti cestovnog prijevoza i obavljanje te djelatnosti, sadržaj i oblik licence prijevoznika, izvoda licenci i vođenja evidencije o istima, kao i uvjeti za obavljanje poslova vozača u međunarodnom cestovnom prijevozu ako upravljaju vozilima za koja je potrebna vozačka dozvola kategorije C, CE, D ili DE i/ili odgovarajuće potkategorije.

Član 2. (Područje primjene)

(1) Ovaj se Pravilnik primjenjuje na svako pravno i fizičko lice (u daljem tekstu: prijevoznik) registrirano u Bosni i Hercegovini koja obavljaju djelatnost cestovnog prijevoza.

(2) Ovaj Pravilnik se ne primjenjuje na:

- a) prijevoze koji se obavljaju u teretnom saobraćaju isključivo motornim vozilima ili kombinacijom vozila, pri čemu najveća dopuštena masa vozila ne prelazi 3,5 tone.
- b) prijevoze koji se obavljaju u putničkom ili teretnom saobraćaju isključivo u nekomercijalne svrhe.
- c) prijevoze pošte kao univerzalne usluge;
- d) vozilo namijenjeno za prijevoz manje od devet lica uključujući i vozača;
- e) vozilo koje se koristi za prijevoz u pograničnom pojasu, u skladu sa međunarodnim ugovorima i drugim propisima koji reguliraju oblast pograničnog prijevoza;
- f) specijalizirano vozilo koje se koristi u medicinske svrhe;
- g) specijalizirano vozilo za prijevoz opreme za cirkuse i zabavne parkove;
- h) posebno opremljeno vozilo čija je namjena edukacija u stanju mirovanja (bibliobus i slično);
- i) specijalizirano vozilo za prijevoz novca i vrijednosti;
- j) specijalizirano vozilo namijenjeno korištenju u vezi sa zaštitom od poplava, za održavanje vode, plina i elektriciteta, telegrafa i telefonskih usluga, radijskih i televizijskih emitiranja;
- k) vozilo čija najveća dopuštena brzina ne prelazi 45 km/h;
- l) vozilo koje koristi ili je pod nadzorom oružanih snaga, civilne zaštite, vatrogasnih službi i snaga odgovornih za održavanja javnog reda;
- m) vozilo koje se koristi za provjeru na cesti radi tehničkog razvoja, popravaka ili održavanja, te novih ili prenamijenjenih vozila koja još nisu puštena u upotrebu;

- n) vozilo koje se koristi za prijevoz posmrtnih ostataka.

Član 3. (Definicije)

Pojmovi korišteni u ovom Pravilniku imaju slijedeće značenje:

- a) "**licenca**" je odobrenje za obavljanje međunarodnog i međuentitetskog cestovnog prijevoza putnika ili tereta;
- b) "**izvod licence**" je odobrenje za vozilo kojim se obavlja međunarodni i međuentitetski cestovni prijevoz putnika ili tereta;
- c) "**upravitelj prijevoza**" je fizičko lice zaposleno u poduzeću ili, ako je poduzeće fizičko lice, to lice, koje upravlja prijevoznom djelatnošću tog poduzeća;
- d) "**potvrda o stručnoj osposobljenosti upravitelja prijevoza**" je dokument kojim lice dokazuje nivo znanja i praktičnih sposobnosti potrebnih za upravljanje poduzećem za obavljanje međunarodnog prijevoza;
- e) "**potvrda o stručnoj osposobljenosti vozača**" je dokument kojim vozač dokazuje nivo znanja i praktičnih sposobnosti potrebnih za upravljanje motornim vozilom u međunarodnom prijevozu;
- f) "**kvalifikacijska kartica vozača**" je isprava kojom vozač dokazuje stručne kompetencije za obavljanje međunarodnog prijevoza.
- g) "**prijevoz lica u nekomercijalne svrhe**" podrazumijeva prijevoz koji vrše pravna ili fizička lica radi zadovoljenja svojih potreba u vezi sa obavljanjem privredne ili druge djelatnosti za koju su registrirani, vozilima u vlasništvu poduzeća:
 - 1) hoteli, moteli i odmarališta u vršenju prijevoza lica koja su korisnici ugostiteljskih i turističkih aranžmana prijevoznika, bez usputnog primanja i prijevoza drugih lica,
 - 2) kompanije ili agencije u zračnom saobraćaju ako vrše prijevoz lica od aerodroma do grada i obrnuto,
 - 3) zdravstvene ustanove u prijevozu bolesnika i zdravstvenih radnika,
 - 4) kulturna, prosvjetna, sportska društva i druge ustanove u vršenju prijevoza učenika, studenata, nastavnog osoblja, štíćenika, odnosno članova društava,
 - 5) poduzeća, ustanove i druga pravna lica u vršenju prijevoza na odmor i rekreaciju svojih zaposlenih radnika i njihovih porodica, bez usputnog primanja i prijevoza drugih lica i
 - 6) poduzeća i druga pravna lica koja prijevoze svoje zaposlene radnike na posao i sa posla bez usputnog primanja i prijevoza drugih lica.
- h) "**prijevoz tereta u nekomercijalne svrhe**" podrazumijeva prijevoz koji vrše pravna ili fizička lica radi zadovoljenja svojih potreba u vezi sa obavljanjem privredne ili druge djelatnosti za koju su registrirani a vozila koja prevoze teret su u vlasništvu poduzeća pri čemu:
 - 1) prijevoznik je istovremeno i korisnik usluga prijevoza ili jedna ugovorna strana na posebnom ugovoru, tovarnom listu ili otpremnici,
 - 2) teret koji se prijevozi je vlasništvo poduzeća, odnosno poduzeće ga je prodalo, kupilo, dalo u najam ili unajmilo, proizvelo, izdvojilo, preradilo ili popravilo,
 - 3) svrha vožnje je prijevoz tereta u poduzeće ili iz njega, ili njegovo pomicanje unutar ili van poduzeća za vlastite potrebe poduzeća,

- 4) motorna vozila koja se koriste za takav prijevoz voze, u skladu s ugovorenom obavezom, zaposlenici poduzeća ili osoblje koje je poduzeću stavljeno na raspolaganje;
- 5) takav prijevoz je samo pomoćna djelatnost u okviru djelatnosti poduzeća.

II LICENCA PRIJEVOZNIKA

Član 4. (Licenca prijevoznika)

(1) Na zahtjev prijevoznika, Ministarstvo komunikacija i prometa Bosne i Hercegovine (u daljem tekstu: Ministarstvo) izdaje licencu prijevoznika za obavljanje međunarodnog prijevoza (u daljem tekstu: licenca) kao i odgovarajući broj izvoda licenci, ukoliko prijevoznik ispunjava uvjete propisane ovim Pravilnikom.

(2) Izdata licenca se pohranjuje kod prijevoznika. Prijevozniku se izdaje i odgovarajući broj izvoda licence, čiji broj odgovara broju vozila kojima imalac licence raspolaže ili na osnovu svojeg prava vlasništva ili na osnovu ugovora o najmu ili ugovora o lizingu.

(3) Licenca i svaki izvod licence nose serijski broj, te pečat i potpis izdavaoca.

(4) Licenca se izdaje na ime prijevoznika i nije prenosiva. Izvod licence mora se nalaziti u vozilu.

(5) U slučaju skupa vozila, izvod licence mora se nalaziti u motornom vozilu i vrijedi za skup vozila i u slučaju da prikolica ili poluprikolica nije registrirana na ime imaoca licence.

(6) Zahtjev za izdavanje licence i izvoda licenci iz stava (1) ovog člana podnosi se na obrascu koji je dat u Prilogu 1 i 2 i čini sastavni dio ovog Pravilnika.

Član 5. (Vrste licenci)

(1) Licenca se izdaje za slijedeće vrste prijevoza:

- a) međunarodni prijevoz putnika i
- b) međunarodni prijevoz tereta.

(2) Licenca iz stava (1) ovog člana važi i za obavljanje odgovarajućeg međuentitetskog prijevoza.

Član 6. (Uvjeti za dobijanje licence)

Za dobijanje licence prijevoznik treba imati ispunjene uvjete u vezi:

- a) poslovnog nastana;

- b) dobrog ugleda;
- c) finansijskog položaja i
- d) stručne osposobljenosti.

Član 7. **(Period važenja licence)**

- (1) Licenca se izdaje na zahtjev prijevoznika, po utvrđivanju ispunjenosti uvjeta propisanih ovim Pravilnikom, na period važenja od deset godina od dana izdavanja.
- (2) Uvjeti za izdavanje licence moraju biti ispunjeni sve vrijeme važenja licence.
- (3) Nakon podnošenja zahtjeva za produženje roka važenja licence provjerava se ispunjavanje uvjeta kao kod prvog zahtjeva za izdavanje licence.

Član 8. **(Uvjeti u vezi sa zahtjevom u pogledu poslovnog nastana)**

Prijevoznik mora imati sjedište ili prebivalište u Bosni i Hercegovini, te prostorije u kojima čuva svoju poslovnu, računovodstvenu, kadrovsku dokumentaciju, kao i dokumentaciju koja sadrži podatke o trajanju vožnje i odmora, te druge propisane dokumente koji moraju biti dostupni nadležnom tijelu, što dokazuje odgovarajućim dokumentima i izjavom.

Član 9. **(Uvjeti koji se odnose na zahtjeve o dobrom ugledu)**

- (1) Dobar ugled nema pravno ili fizičko lice i upravitelj prijevoza:
 - 1) koje je pravosnažno bezuvjetno osuđeno zbog krivičnog djela protiv radnih odnosa i socijalnog osiguranja, okoliša, opće sigurnosti, sigurnosti saobraćaja, imovine, privrede, službene dužnosti te zbog krivičnog djela falsifikovanja,
 - 2) kojoj je izrečena sigurnosna mjera zabrane obavljanja djelatnosti cestovnog prijevoza,
 - 3) koje je osuđeno za druga krivična djela na kaznu zatvora duže od godinu dana.
- (2) Dobar ugled se dokazuje izvodom iz krivične evidencije, ne starijim od tri mjeseca od dana izdavanja na dan podnošenja zahtjeva za izdavanje licence.

Član 10. **(Uvjeti koji se odnose na zahtjev o finansijskom položaju)**

Prijevoznik ima finansijsku sposobnost ukoliko:

- a) na dan podnošenja zahtjeva ima na raspolaganju kapital u ukupnom iznosu od najmanje 9.000,00 EUR za prvo, te 5.000,00 EUR za svako slijedeće motorno vozilo, u protuvrijednosti KM po kursu Centralne banke Bosne i Hercegovine na dan podnošenja zahtjeva, što dokazuje

najmanje jednim od slijedećih dokumenata koji mora biti original ili ovjerena fotokopija, a čije vrijednosti se kumulativno sabiraju:

- 1) izvodom iz odgovarajućeg registra o visini osnivačkog kapitala;
- 2) bilansom stanja i uspjeha, podnesenoj nadležnoj poreskoj upravi, za zadnji obračunski period prije podnošenja zahtjeva;
- 3) procjenom neopterećene nekretnine, u vlasništvu prijevoznika, izraženoj u novcu od strane ovlaštenog sudskog vještaka;
- 4) ugovorom o namjenski vezanom depozitu u banci, minimalno za period trajanja licence;
- 5) potvrdom o raspoloživim sredstvima, garancijom banke ili druge finansijske institucije o kreditnoj sposobnosti, minimalno za period trajanja licence.

b) nema dospjelih a neizmirenih obaveza više od tri mjeseca prema nadležnim poreznim upravama za direktno i indirektno oporezivanje.

Član 11.

(Uvjeti koji se odnose na zahtjev o stručnoj osposobljenosti)

(1) Prijevoznik ispunjava uvjet stručne osposobljenosti ukoliko ima stalno zaposlenog stručno osposobljenog upravitelja prijevoza koji je položio ispit stručne osposobljenosti, osim ako ovim Pravilnikom nije drugačije propisano.

(2) Upravitelj prijevoza mora imati prebivalište ili odobren boravak uz stečenu radnu dozvolu u Bosni i Hercegovini.

(3) Izuzetno od odredbi stava (1) ovog člana, upravitelj prijevoza može biti angažiran u skladu sa važećim zakonom o radu za upravljanje poslovima prijevoza kod najviše dva prijevoznika, pri čemu ukupan vozni park kojim upravlja ne može biti veći od 20 vozila.

Član 12.

(Motorna vozila)

(1) Prijevoznik mora imati na raspolaganju (u vlasništvu ili imati pravo korištenja, po osnovu ugovora o lizingu ili ugovora o zakupu vozila), odgovarajuće registrirano motorno vozilo u Bosni i Hercegovini za obavljanje međunarodnog prijevoza putnika ili tereta.

(2) Za vozila iz stava (1) ovog člana prijevoznik dostavlja i ovjerenu kopiju potvrde o registraciji.

(3) U slučaju da prijevoznik koristi vozilo po osnovu ugovora o najmu, prijevoznik je obavezan, uz zahtjev, dostaviti ugovor kojim su regulirana međusobna prava i obaveze.

(4) Vozilo u isto vrijeme ne može biti na raspolaganju kod dva ili više prijevoznika.

(5) Prijevoznik, u svakom trenutku važenja licence, mora raspolagati sa najmanje onoliko registriranih motornih vozila iz stava (1) ovog člana, koliko posjeduje izvoda licenci, o čemu je dužan obavještavati Ministarstvo.

Član 13.
(Podnošenje zahtjeva za izdavanje licence)

(1) Zahtjev za izdavanje licence i izvoda licence zajedno sa dokumentacijom kojom se dokazuje ispunjavanje uvjeta propisanih ovim Pravilnikom dostavlja se Ministarstvu ili nadležnim entitetskim ministarstvima ili tijelu Brčko distrikta Bosne i Hercegovine (u daljem tekstu: Distrikt BiH).

(2) Organ koji je zaprimio zahtjev prijevoznika obrađuje dostavljenu dokumentaciju, te podatke unosi u bazu podataka putem jedinstvenog informacionog sistema.

(3) Uz zahtjev za izdavanje licence, prijevoznik je dužan dokazati da nema dospjelih a neizmirenih obaveza više od tri mjeseca prema nadležnim poreznim upravama za direktno i indirektno oporezivanje, što dokazuje potvrdama ne starijima od 30 dana.

(4) Ukoliko podnosilac zahtjeva ispunjava uvjete propisane ovim Pravilnikom, Ministarstvo donosi rješenje o dodjeli licenci, nakon čega izdaje licencu za obavljanje međunarodnog cestovnog prijevoza, odgovarajući broj izvoda licence, i iste dostavlja putem pošte na adresu podnosioca zahtjeva.

(5) Ukoliko podnosilac zahtjeva ispunjava uvjete propisane ovim Pravilnikom, organ koji je zaprimio zahtjev može da izda potvrdu na obrascu koji je Prilog 3 Pravilnika i čini njegov sastavni dio, iz kojeg je vidljivo da su ispunjeni uvjeti za izdavanje licence koji vrijedi u svrhu obavljanja prijevoza do izdavanja licence i izvoda licence, a najdalje 30 dana od dana izdavanja ispisa.

(6) Dokumentacija zaprimljena u nadležnim entitetskim ministarstvima se, uz zahtjeve, najmanje dva puta godišnje dostavlja Ministarstvu na arhiviranje.

(7) Izgled, sadržaj i sigurnosna obilježja licence i izvoda licence dati su u Prilozima 4, 5, 6, 7 i 8 čine sastavni dio ovog Pravilnika.

Član 14.
(Naknada za izdavanje licence)

(1) Za vođenje postupka izdavanja i izradu licence i/ili izvoda licence prijevoznik obavezan je uplatiti naknadu, čiju visinu, na prijedlog Ministarstva, posebnom odlukom utvrđuje Vijeće ministara Bosne i Hercegovine (u daljem tekstu: Vijeće ministara).

(2) Namjenu sredstava prikupljenih po osnovu prihoda iz stava (1) ovog člana, na prijedlog Ministarstva, posebnom odlukom utvrđuje Vijeće ministara.

Član 15.
(Privremeno oduzimanje licence)

- (1) U slučaju prestanka ispunjavanja jednog ili više uvjeta za posjedovanje licence, što je utvrđeno po službenoj dužnosti ili od strane nadležnih tijela, Ministarstvo donosi rješenje o privremenom oduzimanju licence te određuje rok, ne duži od jednog mjeseca, u kojem podnosilac mora dokazati ispunjavanje uvjeta.
- (2) Rješenjem o privremenom oduzimanju nalaže se prijevozniku da izvrši povrat licence i svih dokumenata izdatih na osnovu licence u roku od osam dana od dana prijema rješenja.
- (3) Nakon što rješenje o privremenom oduzimanju licence postane konačno, Ministarstvo isto dostavlja nadležnim inspekcijskim organima u Bosni i Hercegovini.

Član 16.
(Oduzimanje licence)

- (1) Ministarstvo donosi rješenje o oduzimanju licence u slijedećim slučajevima:
- a) kada se utvrdi da je licenca izdata na osnovu netačnih i/ili falsifikovanih podataka, dostavljenih od strane prijevoznika;
 - b) obavljanja vrste prijevoza koji nije odobren licencom;
 - c) obavljanja prijevoza nakon privremenog oduzimanja i/ili neotklanjanja nedostataka u ostavljenom roku;
 - d) zloupotrebom izvoda licence.
- (2) Prijevozniku kojem je oduzeta licenca, ne može se izdati nova licenca za vrijeme od dvije godine od dana oduzimanja iste.
- (3) Nakon što rješenje o oduzimanju licence i izvoda licence postane konačno, Ministarstvo isto dostavlja nadležnim inspekcijskim organima u Bosni i Hercegovini.

Član 17.
(Gubitak, krađa, uništenje ili oštećenje licence i/ili izvoda licence)

- (1) Prijevoznik je dužan, u roku od osam dana od dana gubitka, krađe ili uništenja licence, i/ili izvoda licence, oglasiti iste nevažećim u jednom od službenih glasnika u Bosni i Hercegovini.
- (2) Uz zahtjev za ponovo izdavanje, prijevoznik je dužan dostaviti dokaz o oglašavanju iz stava (1) ovog člana.
- (3) U slučaju oštećenja, prijevoznik je dužan iste dostaviti Ministarstvu, nakon čega mu se ponovo izdaje licenca i/ili izvod licence.

Član 18.
(Prestanak važenja licence i/ili izvoda licence)

- (1) Licenca za obavljanje međunarodnog prijevoza prestaje važiti:
- a) prestankom ispunjavanja jednog ili više uvjeta propisanih ovim Pravilnikom a na osnovu kojih je izvršena dodjela licence,
 - b) na zahtjev prijevoznika,
 - c) brisanjem upisa prijevoznika iz sudskog registra, odnosno drugog registra u koji je prijevoznik upisan,
 - d) istekom perioda važenja,
 - e) pravosnažnim oduzimanjem.
- (2) O prestanku važenja licence se donosi posebno rješenje.

Član 19.
(Promjena podataka)

Prijevoznik kojem je dodijeljena licenca i izvodi licence, u slučaju promjene podataka koji su utjecali na postupak izdavanja istih, dužan je u roku od petnaest dana od dana nastanka promjene obavijestiti Ministarstvo.

Član 20.
(Obavezni dokumenti u vozilu)

Za vrijeme obavljanja međunarodnog cestovnog prijevoza, osim dokumentacije propisane drugim propisima, prijevoznik tokom obavljanja vožnje u vozilu mora imati:

- a) izvod licence i
- b) u slučaju najma vozila, važeći ugovor o najmu vozila.

III KVALIFIKACIJSKA KARTICA VOZAČA

Član 21.
(Uvjeti za stjecanje kvalifikacijske kartice vozača)

- (1) Uvjete za stjecanje kvalifikacijske kartice vozača, u smislu ovog Pravilnika, utvrđuje Ministarstvo na osnovu:
- a) dokaza o prebivalištu ili radne dozvole u Bosni i Hercegovini,
 - b) dokaza o pravu upravljanja vozilima, minimalno C1 podkategorije za prijevoz tereta i/ili minimalno D1 podkategorije za prijevoz putnika, izdatog od nadležnog organa u Bosni i Hercegovini,
 - c) dokaza o završenom srednjoškolskom obrazovanju za vozača, najmanje III stepen odnosno KV, i
 - d) potvrde o stručnoj osposobljenosti vozača, ukoliko ovim Pravilnikom nije drugačije propisano.

(2) Vozač može imati samo jednu kvalifikacijsku karticu vozača, koja se izdaje sa rokom važenja od pet godina.

(3) Produženje kvalifikacijske kartice se vrši izdavanjem nove kvalifikacijske kartice, uz dostavljanje dokaza o prijetodno završenom periodičnom stručnom osposobljavanju iz člana 35. ovog Pravilnika.

(4) Izgled, sadržaj i sigurnosna obilježja kvalifikacijske kartice dat je u Prilozima 8 i 9 i čini sastavni dio ovog Pravilnika.

Član 22.

(Izdavanje kvalifikacijske kartice vozača)

(1) Zahtjev za izdavanje kvalifikacijske kartice vozača dostavlja se Ministarstvu ili nadležnim entitetskim ministarstvima ili organu Distrikta BiH.

(2) Organ koji je zaprimio zahtjev obrađuje dostavljenu dokumentaciju, te podatke unosi u bazu podataka putem jedinstvenog informacionog sistema.

(3) Ukoliko podnosilac zahtjeva ispunjava uvjete propisane ovim Pravilnikom, organ koji je zaprimio zahtjev može da izda potvrdu na obrascu koji je Prilog 3 Pravilnika i čini njegov sastavni dio, iz koje je vidljivo da su ispunjeni uvjeti za izdavanje kvalifikacijske kartice vozača, koja vrijedi u svrhu obavljanja prijevoza do izdavanja kvalifikacijske kartice, a najdalje 30 dana od dana izdavanja ispisa.

(4) Ukoliko podnosilac ispunjava uvjete propisane ovim Pravilnikom, Ministarstvo donosi rješenje o dodjeli kvalifikacijske kartice vozača, izrađuje karticu, i iste dostavlja putem pošte na adresu fizičkog lica - podnosioca zahtjeva.

(5) Dokumentacija zaprimljena uz zahtjeve, ukoliko isti nisu zaprimljeni u Ministarstvu, najmanje se dva puta godišnje dostavlja Ministarstvu na arhiviranje.

(6) Izgled i sadržaj zahtjeva za izdavanje kvalifikacijske kartice vozača dat je u Prilogu 10 i čini sastavni dio ovog Pravilnika.

Član 23.

(Naknada za izdavanje kvalifikacijske kartice vozača)

(1) Za vođenje postupka izdavanja i izradu kvalifikacijske kartice vozača podnosilac zahtjeva je obavezan uplatiti naknadu, čiju visinu, na prijedlog Ministarstva, posebnom odlukom utvrđuje Vijeće ministara.

(2) Namjenu sredstava prikupljenih po osnovu prihoda iz stava (1) ovog člana, na prijedlog Ministarstva, posebnom odlukom utvrđuje Vijeće ministara.

Član 24.
(Gubitak, krađa, uništenje ili oštećenje kvalifikacijske kartice vozača)

(1) Vozač je dužan, u roku od osam dana od dana gubitka, krađe ili uništenja kartice, oglasiti istu nevažećim u jednom od službenih glasnika u Bosni i Hercegovini.

(2) Uz zahtjev za ponovo izdavanje, vozač je dužan dostaviti dokaz o oglašavanju iz stava (1) ovog člana.

(3) U slučaju oštećenja, vozač je dužan istu dostaviti Ministarstvu, nakon čega mu se ponovo izdaje kvalifikacijska kartica.

Član 25.
(Oduzimanje kvalifikacijske kartice vozača)

(1) Ministarstvo donosi rješenje o oduzimanju kvalifikacijske kartice vozača u slijedećim slučajevima:

- a) kada se utvrdi da je kvalifikacijska kartica vozača izdata na osnovu netačnih i/ili falsifikovanih podataka;
- b) kada vozač koji ima izdatu kvalifikacijsku karticu vozača iz bilo kakvih razloga istu ustupi drugom vozaču na korištenje;
- c) kada vozač koji ima izdatu kvalifikacijsku karticu vozača koristi karticu izdatu drugom vozaču.

(2) Vozaču kojem je oduzeta kvalifikacijska kartica vozača ne može se izdati kvalifikacijska kartica za vrijeme od dvije godine od dana oduzimanja iste.

(3) Nakon što rješenje o oduzimanju kvalifikacijske kartice vozača postane konačno, Ministarstvo isto dostavlja nadležnim inspekcijskim organima u Bosni i Hercegovini.

Član 26.
(Prestanak važenja kvalifikacijske kartice)

Kvalifikacijska kartica vozača za obavljanje međunarodnog cestovnog prijevoza prestaje važiti:

- a) odjavom,
- b) istekom roka važenja,
- c) oduzimanjem.

Član 27.
(Obavezni dokumenti vozača)

Za vrijeme obavljanja međunarodnog cestovnog prijevoza, osim dokumentacije propisane drugim propisima, vozač tokom obavljanja vožnje u vozilu mora imati:

- a) kvalifikacijsku karticu vozača,

- b) važeći ugovor o radu sa prijevoznikom čijim vozilom upravlja,
- c) ovjerena fotokopija potvrde o uplaćenim doprinosima/osiguranju nadležnog poreskog organa izdata na propisanom obrascu.

IV STRUČNE ORGANIZACIJE

Član 28. (Opis poslova stručnih organizacija)

Stručne organizacije za provođenje ispita za stjecanje stručne osposobljenosti upravitelja prijevoza, početno i periodično stručno osposobljavanje i organizaciju i provođenje ispita za vozača u međunarodnom cestovnom prijevozu obavljaju slijedeće poslove:

- a) organiziranje i obavljanje ispita za upravitelja prijevoza i vozača u međunarodnom cestovnom prijevozu,
- b) organiziranje i obavljanje početnog stručnog osposobljavanja za vozača u međunarodnom cestovnom prijevozu,
- c) organiziranje i obavljanje periodičnog stručnog osposobljavanja za vozača u međunarodnom cestovnom prijevozu,
- d) uspostavljanje i održavanje baze podataka o provedenim ispitima za upravitelja prijevoza,
- e) izdavanje potvrda o stručnoj osposobljenosti upravitelja prijevoza i vođenju evidencije o istima,
- f) izdavanje potvrda o stručnoj osposobljenosti vozača i vođenju evidencije o istima,
- g) uspostavljanje i održavanje baze podataka o provedenom stručnom osposobljavanju i ispitima, vođenju evidencije o provedenom ispitu za svakog kandidata hronološkim redoslijedom.
- h) dostavljanje izvještaja Ministarstvu o svom radu i provedenim ispitima i osposobljavanjima, najmanje jednom mjesečno.
- i) arhiviranje kompletne dokumentacije i evidencije.

Član 29. (Uvjeti za stručnu organizaciju i provođenje stručnog ispita za upravitelja prijevoza u međunarodnom cestovnom prijevozu)

(1) Poslove iz oblasti organizacije i provođenja ispita za upravitelja prijevoza, početno i periodično stručno osposobljavanje i organizaciju i provođenje ispita za vozača u međunarodnom cestovnom prijevozu mogu obavljati stručne organizacije koje imaju odobrenje Ministarstva.

(2) Odobrenje za obavljanje poslova iz stava (1) ovog člana izdaje se, nakon provedenog postupka po javnom pozivu, stručnoj organizaciji koja:

- a) u rješenju o registraciji pravnog subjekta, u dijelu djelatnost, ima registrirane poslove:
 - 1) obrazovanja odraslih i ostalo obrazovanje koje nije definirano stepenom obrazovanja,
 - 2) poslove tehničkog i stručnog srednjeg obrazovanja,
 - 3) djelatnosti vozačkih škola ili škola za vozače,
 - 4) izradu, obradu i upravljanje bazama podataka,

- 5) izdavanje knjiga, časopisa i sličnih periodičnih izdanja, sve u skladu sa propisima entiteta i Distrikta BiH kojima se uređuje nomenklatura djelatnosti, te da je ovlašteno od nadležnog entitetskog, kantonalnog i tijela Distrikta BiH za obavljanje predmetnih poslova.
- b) ima u radnom odnosu na neodređeno vrijeme s punim radnim vremenom stručne kadrove za provođenje kvalitetne obuke iz svih tematskih područja utvrđenih Prilogom broj 11 ovog Pravilnika i to: najmanje 10 zaposlenika koji imaju najmanje visoku stručnu spremu ili stečenih najmanje 240 ECTS bodova, od čega najmanje pet zaposlenika saobraćajnog cestovnog smjera, a ostale mašinskog, ekonomskog, informatičkog ili pravnog smjera,
 - c) je akreditirana od najmanje jedne međunarodne organizacije za programe stjecanja profesionalnih kompetencija, u skladu sa zakonodavstvom Evropske unije,
 - d) ima program za stjecanje početnog i periodičnog stručnog osposobljavanja, kojim se utvrđuju nastavni sadržaji, plan provođenja i nastavne metode, izrađen u skladu sa minimalnim zahtjevima i sadržajima obuke za početnu kvalifikaciju i provođenje periodične obuke, koje posebnom odlukom utvrđuje Ministarstvo;
 - e) ima osiguran namjenski prostor za poslove stručnog osposobljavanja od najmanje deset opremljenih učionica s najmanje 20 sjedećih mjesta po svakoj učionici.
 - f) ima u vlasništvu ili zakupu najmanje po jedno motorno vozilo kategorija C1, C1E, C, CE, D1, D1E, D i DE, opremljeno za osposobljavanje, odnosno najmanje po jedno vozilo one kategorije za koju će provoditi stručno osposobljavanje.
 - g) ima u vlasništvu nastavna sredstva i pomagala za izvođenje programa početnog ili periodičnog osposobljavanja, informatičku opremu i program za realizaciju teorijskog dijela osposobljavanja (računar i projektor u učionici), šeme pojedinih sklopova vozila (originalni ili umanjeni modeli sklopova vozila, primjerice mjenjač, motor, i slično), analogni i digitalni tahograf, stručnu literaturu koja obuhvata sva tematska područja utvrđena Prilogom 11 ovog Pravilnika.
 - h) ima u vlasništvu računarsku opremu za ostvarivanje informatičke povezanosti, od najmanje 20 fiksnih ili prijenosnih računara.

(3) Za obavljanje poslova može se odrediti ona stručna organizacija kojoj je obavljanje poslova iz stava (2), alineja a), tačke 1), 2) i 3) ovog člana osnovna djelatnost.

(4) Odobrenje za obavljanje poslova iz stava (1) ovog člana Ministarstvo izdaje na period od pet godina, o čemu se zaključuje ugovor kojim se preciziraju prava i obaveze.

(5) Stručna organizacija koja je stekla ovlaštenje za provođenje poslova iz stava (1) ovog člana dužna je ispunjavati uvjete za stjecanje odobrenja sve vrijeme trajanja odobrenja.

Član 30.

(Nadzor i kontrola provođenja odobrenja)

(1) Nadzor i kontrolu nad radom stručnih organizacija provodi Ministarstvo, najmanje dva puta godišnje.

(2) Stručnoj organizaciji kojoj se utvrdi da ne obavlja poslove iz člana 28. ovog Pravilnika ili koja prestane ispunjavati jedan ili više uvjeta iz člana 29. ovog Pravilnika, oduzima se odobrenje.

V STRUČNO OSPOSABLJAVANJE I PROVOĐENJE ISPITA

Član 31.

(Stručna osposobljenost upravitelja prijevoza)

(1) Za stjecanje potvrde o stručnoj osposobljenosti upravitelj prijevoza mora imati obrazovanje saobraćajne struke, minimalno IV stepena, osim ako ovim Pravilnikom nije drugačije određeno i znanja predviđena Prilogom 11 koji čini sastavni dio ovog Pravilnika.

(2) Znanja se dokazuju obaveznim usmenim i pisanim ispitom iz stručnih područja kojeg provodi ovlaštenu organ imenovan rješenjem Ministarstva.

(3) Obaveza polaganja ispita iz stava (2) ovog člana ne odnosi se na upravitelja prijevoza koji je imenovan za fizička i/ili pravna lica registrirana za obavljanje djelatnosti međunarodnog cestovnog prijevoza koja ne raspolažu s više od dva motorna vozila.

(4) Organizacija ispita iz stava (2) ovog člana provodi se u skladu sa Prilogom 12 i čini sastavni dio ovog Pravilnika.

Član 32.

(Potvrda o stručnoj osposobljenosti upravitelja prijevoza)

(1) Potvrda o stručnoj osposobljenosti upravitelja prijevoza izdaje se nakon uspješno položenog ispita i nije prenosiva na drugo lice.

(2) Sadržaj i sigurnosna obilježja potvrde iz stava (1) propisani su Prilozima 13 i 15 i čine sastavni dio ovog Pravilnika.

Član 33.

(Oslobađanje od obaveze polaganja ispita i priznavanje potvrde)

- (1) Obaveze polaganja ispita stručne osposobljenosti za upravitelja prijevoza oslobođeno je:
- a) lice koje ima najmanje VII stepen saobraćajnog cestovnog usmjerenja, odnosno koje ima minimalno 240 ECTS bodova saobraćajnog cestovnog usmjerenja.
 - b) lice koje ima završeno visoko obrazovanje pravnog, ekonomskog, saobraćajnog ili mašinskog smjera oslobođeno je polaganja dijela ispita iz predmeta koje je tokom svog obrazovanja položilo;
 - c) lice koje ima najmanje VI stepen saobraćajnog cestovnog usmjerenja, odnosno koje ima minimalno 180 ECTS bodova saobraćajnog cestovnog usmjerenja uz predočavanje dokaza da je u zadnje tri godine kontinuirano učestvovalo u međunarodnom cestovnom prijevozu, što dokazuje odgovarajućim dokumentima;
 - d) lice koje ima najmanje IV stepen saobraćajnog cestovnog usmjerenja, uz predočavanje dokaza da je u zadnjih pet godina kontinuirano učestvovalo u međunarodnom cestovnom prijevozu, što dokazuje odgovarajućim dokumentima;
 - e) lice koje ima najmanje III stepen saobraćajnog cestovnog usmjerenja, uz predočavanje dokaza da je u zadnjih sedam godina kontinuirano učestvovalo u međunarodnom cestovnom prijevozu, što dokazuje odgovarajućim dokumentima.

- f) lice koje predoči dokaze da je u zadnjih 10 godina prije 4. decembra 2009. kontinuirano upravljalo saobraćajnim aktivnostima poduzeća za teretni ili putnički saobraćaj.

(2) Lice koje posjeduje potvrdu o stručnoj osposobljenosti za upravitelja prijevoza izdatu u nekoj od država Evropske unije, polaže pismeni ispit iz relevantnog zakonodavstva u Bosni i Hercegovini.

Član 34.

(Početno stručno osposobljavanje vozača)

(1) Za stjecanje potvrde o početnoj stručnoj osposobljenosti vozač mora imati znanja predviđena Prilogom 14 koji čini sastavni dio ovog Pravilnika, a što se osigurava provođenjem stručnog osposobljavanja.

(2) Nakon provedenog početnog stručnog osposobljavanja, znanja se dokazuju obaveznim pisanim ispitom.

(3) Potvrda o početnoj stručnoj osposobljenosti vozača izdaje se nakon uspješno položenog pisanog ispita i nije prenosiva na drugo lice.

(4) Sadržaj i sigurnosna obilježja potvrde iz stava (3) ovog člana propisani su Prilozima 15 i 16 i čine sastavni dio ovog Pravilnika.

(5) Obaveze stjecanja početne stručne osposobljenosti vozača iz stava (1) ovog člana i polaganja ispita iz stava (2) ovog člana oslobođeni su:

- a) vozači koji posjeduju vozačku dozvolu kategorija D1, D1+E, D ili D+E ili vozačku dozvolu koja se priznaje kao identična, izdatu najkasnije do 10. septembra 2008. godine;
- b) vozači koji posjeduju vozačku dozvolu kategorija C1, C1+E, C ili C+E ili vozačku dozvolu koja se priznaje kao identična, izdatu najkasnije do 10. septembra 2009. godine.

(6) Lice koje ima potvrdu o stručnoj osposobljenosti za vozača izdatu u nekoj od država Evropske unije, za stjecanje početnih kvalifikacija dužno je polagati pismeni ispit iz zakonodavstva na snazi u Bosni i Hercegovini.

Član 35.

(Periodično stručno osposobljavanje vozača)

(1) Za stjecanje potvrde o periodičnoj stručnoj osposobljenosti vozač mora imati srednjoškolsko obrazovanje za vozača, najmanje III stepen odnosno KV, i znanja predviđena Prilogom 11 koji čini sastavni dio ovog Pravilnika, a što se osigurava provođenjem stručnog osposobljavanja.

(2) Vozač je dužan pristupiti periodičnom stručnom osposobljavanju najmanje jednom u svakih pet godina.

(3) Nakon provedenog periodičnog stručnog osposobljavanja izdaje se potvrda o stručnoj osposobljenosti sa rokom važenja od pet godina.

Član 36.
(Cjenovnik stručnog ispita i stručnog osposobljavanja)

(1) Cjenovnik, na prijedlog Ministarstva, uz pribavljeno mišljenje ovlaštenih organa, odlukom utvrđuje Vijeće ministara, za:

- a) provođenje stručnog ispita i izdavanja potvrde o stručnoj osposobljenosti upravitelja prijevoza u međunarodnom cestovnom prijevozu;
- b) provođenje osposobljavanja za stjecanje početnih kvalifikacija za vozača u međunarodnom cestovnom prijevozu;
- c) provođenje periodičnog stručnog osposobljavanja za vozača u međunarodnom cestovnom prijevozu;
- d) provođenje stručnog ispita i izdavanja potvrde o stručnoj osposobljenosti za vozača u međunarodnom cestovnom prijevozu.

(2) Troškove prema cjenovniku iz stava (1) ovog člana snosi podnosilac zahtjeva.

(2) Namjenu sredstava prikupljenih po osnovu prihoda iz stava (1) ovog člana, na prijedlog Ministarstva, posebnom odlukom utvrđuje Vijeće ministara.

OSTALE ODREDBE

Član 37.
(Nadzor)

(1) Kontrolu prijevoznika kojima je dodijeljena licenca prema uvjetima propisanim ovim Pravilnikom provodi Ministarstvo i nadležni inspeksijski organi u Bosni i Hercegovini.

(2) Kontrole iz stava (1) ovog člana koje provodi Ministarstvo, moraju obuhvatiti najmanje 20% ukupnog broja prijevoznika koji posjeduju važeće licence tokom jedne kalendarske godine.

Član 38.
(Elektronski upisnici)

(1) Ministarstvo u elektronskom upisniku čuva i objavljuje podatke o prijevoznicima kojima su izdate licence.

(2) Elektronski upisnici sadrže slijedeće podatke:

- a) naziv i pravni oblik poduzeća;
- b) adresu njegova poslovnog nastana;
- c) imena i prezimena upravitelja prijevoza imenovanih radi ispunjenja uvjeta dobrog ugleda i stručne osposobljenosti;

- d) imena i prezimena vozača koji posjeduju kvalifikacijsku karticu vozača;
- e) vrsta licence, broj vozila na koja se ona odnosi te serijski broj licence i izvod iz licence;
- f) broj, kategorija i vrsta teških povreda radi kojih je u zadnje dvije godine bila izrečena osuđujuća presuda ili dosuđena kazna ili privremeno ili trajno oduzeta licenca;
- g) imena i prezimena osoba proglašanih nesposobnima upravljati prijevoznom djelatnošću poduzeća, sve dok te osobe ponovno ne steknu dobar ugled.

(3) Podaci iz stava (1) tč. (d), (f) i (g) ovog člana dostupni su javnosti u skladu s relevantnim odredbama o zaštiti ličnih podataka.

(4) U skladu sa važećim propisima kojima je uređena zaštita ličnih podataka i sloboda pristupa informacijama, Ministarstvo će osigurati:

- a) da svako pravno ili fizičko lice ima pravo pristupa podacima koji se na njega odnose, a kojima raspolaže Ministarstvo;
- b) da svako pravno ili fizičko lice čiji su podaci nepotpuni ili netačni ima pravo zatražiti ispravak, brisanje ili blokiranje podataka koji se na njega odnose.

PRIJELAZNE I ZAVRŠNE ODREDBE

Član 39. (Važenje postojećih licenci)

(1) Licence prijevoznika i licence za vozila i iskaznice vozača izdate od strane Ministarstva prije stupanja na snagu ovog Pravilnika, vrijede do dana njihovog isteka.

(2) Licence prijevoznika, licence za vozila i iskaznice vozača izdate od strane nadležnih entitetskih ministarstava i tijela Distrikta BiH prije stupanja na snagu ovog Pravilnika, vrijede do 31.12.2014. godine za obavljanje međunarodnog cestovnog prijevoza.

(3) Kvalifikacijske kartice vozača izdate od strane Ministarstva prije stupanja na snagu ovog Pravilnika, vrijede do dana njihovog isteka, pri čemu se naziv prijevoznika sa kartice ne uzima u obzir u skladu sa odredbama ovog Pravilnika.

Član 40. (Postojeći propisi)

- (1) Danom stupanja na snagu ovog Pravilnika, do donošenja novih propisa, ostaju na snazi:
- a) Cjenovnik stručnog osposobljavanja i ispita upravitelja prijevoza i vozača u međunarodnom cestovnom prijevozu ("Službeni glasnik BiH", broj 8/12) i
 - b) Odluka o visini novčane naknade za izdate licence prijevoznika, licence za vozilo i kvalifikacijske kartice vozača ("Službeni glasnik BiH", broj 53/12).

(2) Stručne organizacije koje posjeduju važeće ovlaštenje za provođenje poslova stručnog osposobljavanja i ispita upravitelja prijevoza i vozača u međunarodnom cestovnom prijevozu su dužne u roku od 60 dana od dana stupanja na snagu ovog Pravilnika dostaviti dokaze o

ispunjavanju uvjeta iz člana 29. ovog Pravilnika te svoje postupanje uskladiti sa odredbama ovog Pravilnika.

Član 41.
(Stavljanje van snage)

- (1) Danom stupanja na snagu ovog Pravilnika prestaju važiti odredbe Pravilnika o uvjetima i postupku izdavanja licenci i kvalifikacijskih kartica vozača za obavljanje međunarodnog cestovnog prijevoza ("Službeni glasnik BiH", br. 81/11, 105/12, 32/13, 76/13 i 18/14).
- (2) Svi postupci koji do dana stupanja na snagu ovog Pravilnika nisu pravosnažno okončani završiti će se po odredbama Pravilnika o uvjetima i postupku izdavanja licenci i kvalifikacijskih kartica vozača za obavljanje međunarodnog cestovnog prijevoza ("Službeni glasnik BiH", br. 81/11, 105/12, 32/13, 76/13, 18/14 i 39/14).

Član 42.
(Stupanje na snagu)

Ovaj Pravilnik stupa na snagu osmog dana od dana objavljivanja u "Službenom glasniku BiH".

Broj:
15. septembra 2014. godine
Sarajevo

MINISTAR

Damir Hadžić